



Uffeci communal Lumnezia / Gemeindeamt Lumnezia
Canzlia communal / Gemeindekanzlei
7144 Vella

Tel 081 920 60 00

Fax 081 920 60 18

e-mail: info@lumnezia.ch

www.lumnezia.ch

PROTOCOL RADUNONZA COMUNALA LUMNEZIA 11 DA MARS 2016

2016/01

11 DA MARS 2016
CANZLIA COMUNALA LUMNEZIA
Palus 32D, 7144 Vella

Gliesta da tractandas

1. Avertura ed elecziun dils dumbravuschs.....	2
2. Protocol dalla radunonza communal dils 11 da december 2015 (2015/04)	2
3. Scassar igl Uorden per manteniment da beins communal dalla vischnaunca da Lumbrein dils 23 d'october 1992.....	2
4. Casa communal Palius a Vella- rendaquen dil project e rapport final.....	3
5. Baghetg da pumpiers, plaz da fermada pigl auto da posta, trottoir, parcadis publics, tualetta publica a Suraua/Uors - rendaquen dil project e rapport final	4
6. Damonda pil dretg da burgheis dalla vischnaunca Lumnezia –.....	5
Mustaf Muzlijaj, naziunalitad da Kosovo	5
7. Project da surbaghegiar igl areal Palius a Vella -.....	6
localitads da stizun, pratica da miedi, habitaziuns e garaschas	6
1) Approbaziun dil project.....	6
2) Concessiun d'in credit da CHF 192'000.00 per elavurar il project da baghegiar	8
8. Varia.....	8

Protocol dalla radunonza communal Lumnezia (2016/01)

Datum: Venderdis, ils 11 da mars 2016
 Liug: Halla plurivalenta dalla casa da scola Sutvitg 28E, 7144 Vella
 Cuoz: 20:00 – 22:00 uras
 Presents: 92 votantas e votants
 Parsura: Duri Blumenthal, president communal
 Actuar: Marcus Cavegn, canzlist communal

Tractandas

1. Avertura ed elecziun dils dumbravuschs

Il president communal Duri Blumenthal arva la radunonza communal cun in beinvegni als presents. El constatescha, che la radunonza communal ei vegnida convocada ad uras conform allas determinaziuns digl artechel 44 ella constituziun dalla vischnaunca Lumnezia, aschia che la radunonza ei cumpetenta da prender conclus.

La radunonza communal approbescha la gliesta da tractandas dils 26 da fevrer 2016 presentada dalla suprastonza communal senza objecziuns.

Seschau perstgisar han

- Rino Caviezel-Bass, Vella, commember dalla cumussiun da gestiun Lumnezia;
- Daniel Solèr-Camenisch, Morissen, commember dalla suprastonza communal Lumnezia;
- Martin Derungs, Camuns, emploiau dall'administraziun communal Lumnezia
- Bistgaun Capaul-Capaul, Lumbrein
- Gerhard Collenberg, Morissen

La radunonza elegia dus dumbravuschs:

- Conradin Caduff, Cumbel;
- Erwin Capeder, Lumbrein.

2. Protocol dalla radunonza communal dils 11 da december 2015 (2015/04)

Il president communal Duri Blumenthal constatescha, ch'igl ei buca vegniu inoltrau recuors en scret aschia ch'il protocol dalla davosa radunonza communal dils 11 da december 2015 (2015/04) vala sco approbaus tenor art. 34 dalla constituziun dalla vischnaunca Lumnezia.

En ina votaziun consultativa approbescha la radunonza communal il protocol cun gronda maioritad e cun ina abstenziun.

3. Scassar igl Uorden per manteniment da beins comunals dalla vischnaunca da Lumbrein dils 23 d'october 1992

Ils 23 d'october 1992 ha la vischnaunca da Lumbrein relaschau igl Uorden per manteniment da beins comunals. Obligai da pagar ina taxa pil manteniment dils beins comunals ei mintga vischin e vischina da 20 – 70 onns, domiciliai a Lumbrein silmeins 3 meins ad onn, sco era mintga possessur d'ina habitaziun ch'ei buca domiciliaus a Lumbrein. La taxa ei d'impunder per il manteniment da tuttas vias da vischnaunca, vias d'uual e manteniment dallas utilitads da vischnaunca, sco pastiras, punts, baghetgs etc., sco era per autras lavurs necessarias ed urgentas, buca fixadas en auters regulativs.

Avon la fusiun vevan pliras vischnauncas uordens semeglionts sco a Lumbrein per reglar la lavur cumina. Quels eran vegni relaschai per saver finanziair las plazzas da luvrer communal tenor pretensiuns digl inspectorat da vischnauncas. Quels uordens ein vegni aboli avon la fusiun da vischnauncas cun excepziun digl Uorden per manteniment da beins comunals dalla vischnaunca da Lumbrein.

Proposta

La suprazionza communal propona alla radunonza communal da cassar igl Uorden per manteniment da beins communal dalla vischnaunca da Lumbrein dils 23 d'october 1992 retroactivamein per igl 1. da schaner 2016.

Decisiun

La radunonza communal decida unanimamein da cassar igl Uorden per manteniment da beins communal dalla vischnaunca da Lumbrein dils 23 d'october 1992 retroactivamein per igl 1. da schaner 2016.

4. Casa communal Palius a Vella- rendaquen dil project e rapport final**1) Quen final pil baghetg dalla casa communal**

Avon in onn e miez ei la casa communal Palius a Vella vegnida inaugurada. Il biro d'architectura Vincenz + Weishaupt Architekten AG, Glion, ha fatg il rendaquen da construcziun dil baghetg da fatschenta Palius 32D a Vella. La patruna da construcziun ei stada la Banca Raiffeisen Surselva. Il rendaquen siara cun cuosts da totalmein CHF 3'823'552.75 e survarga la calculaziun da cuosts da 3'800'000.00 per 0.6 %.

Surpassament calculaziun cuosts	CHF 23'552.75
En connex cul project ein sedai ulteriurs cuosts.	
Register funsil per rededer ils contracts da cumpra	CHF 8'908.00
Spazzar igl anteriur baghetg agricol	CHF 18'127.00
Prestaziuns patruna da construcziun (Banca Raiffeisen Surselva)	CHF 47'673.30
Constituziun proprietad da condomini	<u>CHF 12'220.80</u>
	CHF 86'929.20
Surpli da cuosts	<u>CHF 110'481.95</u>

Plinavon eisi stau necessari da dislocar las lingias d'aqueduct e d'ovras per dismetter las auas piarsas. Ils cuosts da CHF 20'958.85 ein vegni adossai allas finanziaziuns specialas pil provediment d'aua e per la dismessa dallas auas piarsas cun reparer quels ulivamein, cumpart aqueduct communal CHF 10'479.40, cumpart canalisaziun/serenera CHF 10'479.45).

La Banca Raiffeisen Surselva ha surpriu tenor convegnientscha da cooperaziun dils 14 d'uost 2012 cun l'antieriura vischnaunca da Vella per la construcziun comunabla dalla casa da fatschenta Palius a Vella ina cumpart pauschala da CHF 1'000'000.00. Las stipulaziuns ella convegnientscha prevedan ch'eventuals cuosts supplementars van sin donn e cuost dalla vischnaunca.

La Banca Raiffeisen Surselva ha survegniu ina indemnisaziun da CHF 47'673.40 per il management da baghegiar sco patruna da construcziun. Sco tala ha ella saviu decider da surdar lavurs independentamein digl uorden da submissiun. Las prestaziuns dalla vischnaunca per il management dil project da baghegiar ein buca cuntenidas el rendaquen.

La radunonza communal dall'antieriura vischnaunca da Vella ha concediu in credit da CHF 2'800'000.00 per la cumpra dalla casa communal Palius 32D a Vella. Il cuosts finals muntan a totalmein CHF 2'910'481.95 (senza dislocar la lingia d'aua e canalisaziun/serenera existenta), q.v.d. ch'il credit ei vegnius surpassaus per CHF 110'481.95.

Decisiun

La radunonza communal decida cun gronda maioritad, senza cuntravuschs ed abstenziuns, d'approbar il quen final dil project casa communal Palius 32D a Vella e da conceder il credit supplementar da CHF 110'481.95.

2) Quen final cumpra mobílias ed indrezs per la casa communal Palius 32D, Vella

Il mobigliar e divers indrezs ella nova casa communal Palius a Vella eran buca cumpri ella calculaziun dils cuosts da baghegiar dil baghetg, cun quei ch'ins quintava da saver duvra iigl uorden dallas canzlias veglias. La radunonza communal Lumnezia dils 13 da zercladur 2014 ha concediu in credit da frs. 300'000.00 per mobigliar ed indrezs ella nova casa communal Palius a Vella. Ils cuosts totals per la cumpra dallas mobílias ed ils indrezs muntan a frs. 330'733.00, q.v.d. ch'il credit ei vegnius surpassaus per frs. 30'733.00. Igl augment da cuosts seresulta muort in'adattaziun dallas scaffas, ch'ei vegnidas installadas fixas, cun ina partiziun dallas scaffas tenor norma dils ordinaturs ed in indrez da serrar l'entira preit da scaffas digl uffeci da taglia cun ina porta da trer, mobigliar supplementar ch'ins ha stuiu cumprar ed in sbagli ella calculaziun dil credit necessari (buca risguardau la taglia da valeta augmentada tier ina posiziun).

Decisiun

La radunonza communal decida cun gronda maiortad, senza cuntravuschs ed abstenziuns, d'approbar il rendaquen per la cumpra mobílias ed indrezs per la casa communal Palius 32D, Vella, e da conceder il credit supplementar da CHF 30'733.00.

5. Baghetg da pumpiers, plaz da fermada pigl auto da posta, trottoir, parcadis publics, tualetta publica a Suraua/Uors - rendaquen dil project e rapport final

Ils 13 da zercladur 2014 ha la radunonza communal approbau il project per il baghetg da pumpiers, plaz fermada pigl auto da posta e tualetta publica ad Uors ed ha concediu in credit da baghegiar da CHF 1'044'000.00.

Primus Cavegn, cau departament communal per planisaziun dil territori, immobiglias, presenta il rendaquen dil project. Quel secumpona en tut da siat differentas parts. Il project approbau ed il credit concediu cumpigliava quater parts

- Baghetg da pumpiers
- Tualetta publica
- Trottoir
- Plaz da fermada pigl auto da posta

En connex cul project approbau dalla radunonza communal ein vegnidas realisadas treis ulteriuras parts, che la suprastanza communal ha decidu el rom da sias cumpetenzas.

- Treis containers miezsuterrans dil tip molok per rimnar rumians da casa sper il plaz da fermada pigl auto da posta
- Parcadis publics sper il baghetg da pumpiers
- Pilotadi per il provediment d'aua da Suraua e per l'ovra hidraulica da producir forza electrica

La survesta totala dils cuosts da project approbau dalla radunonza communal cuntegn cuosts da CHF 979'593.55. Ei seresulta ina reserva da CHF 64'406.45 enviers il credit concediu. Il rendaquen dil project cuntegn era ils cuosts per la cumpra dalla parcella nr. 207 e per la spazzada dil baghetg che steva sin quella. Plinavon ein vegni risguardai ils cuost da CHF 13'143.60 pil preproject che la vischnaunca da Suraua veva schau far. Ils cuost per la parcella ein vegni partgi tier a mintga project parzial.

	Preventiv	Rendaquen	Surpli / dameins cuosts
1. Baghetg da pumpiers	592'500.00	590'661.65	- 1'838.35
2. Tualetta publica	50'000.00	34'647.45	-15'352.55
3. Trottoir	149'500.00	126'074.95	-23'425.05
4. Plaz fermada auto posta	252'000.00	228'209.50	-23'790.50
Total	1'044'000.00	979'593.55	64'406.45

Enviers il credit concediu da CHF 1'044'000.00 ei quei in spargn da 6.16 %.

L'Assicuranza d'edificis dil Grischun ha approbau il rendaquen pil baghetg da pumpiers e dat ina contribuziun dalla polizia da fiug da 44 % vid ils cuosts imputabels e renconuschi, quei che dat ina summa da CHF 259'891.10.

La regenza dil cantun Grischun ha concediu ina contribuziun per la construcziun per il plaz da fermada ed il trottoir conform art. 30 dalla lescha catunala da vias. Tenor art. 33 da quella lescha ei la contribuziun 35 % dils cuosts imputabels e renconuschi. Quei dat ina summa da CHF 123'999.70.

Dil Padrinadi svizzer per vischnaucas da muntogna survegn la vischnaunca ina contribuziun da CHF 100'000.00.

Ensemen sa la vischnaunca quintar cun contribuziuns da CHF 483'890.80, aschia che la vischnaunca ha da finanziar sezza ina summa da 495'702.75.

Primus Cavegn engrazia als commembers dalla cumissiun da project, ch'el ha presidiau, per la lavur prestada, numnadamein al president communal Duri Blumenthal, a Daniel Solèr, Conradin Caduff e Guido Derungs.

Il president communal Duri Blumenthal engrazia da sia vart per il grond engaschi da Primus Cavegn.

Proposta

La suprastanza propona il project per in baghetg da pumpiers, plaz da fermada pigl auto da posta, trottoir, parcadis publics, tualetta publica a Suraua/Uors per approbaziun alla radunonza communal.

Decisiun

La radunonza communal decida cun gronda maioritad e senza cuntravuschs d'approbar il rendaquen dil project per in baghetg da pumpiers, plaz da fermada pigl auto da posta, trottoir, parcadis publics, tualetta publica a Suraua/Uors, cun cuosts totals da CHF 979'593.55.

6. Damonda pil dretg da burgheis dalla vischnaunca Lumnezia – Mustaf Muzlijaj, naziunalitad da Kosovo

Mustaf Muzlijaj ha fatg la damonda per il dretg da burgheis svizzer agl Uffeci per migraziun e dretg civil dil Grischun. Quel ha constatau che las premissas formalas dil dretg federal e cantunal ein ademplitas per conceder il dretg da burgheis. Mustaf Muzlijaj ha da present ina lubientscha da domicil C per personas digl exteriur. Tenor extract dils 09 da zercladur 2015 ha el buca imputaziuns el register penal svizzer.

Muzlijaj, Mustaf

Naschius ils 24 da december 1991 a Glion / GR, Svizra

Fegl da Haradin Muzlijaj e da Mihri Muzlijaj-Berisha

Buca maridaus

Stadi da patria Kosovo

Sesents da 1991 – 2010 a Degen, dapi ils 21-10-2010 a Vella, ensemen cun ils geniturs

Educaziun da scoletta 1996 – 1998 a Vignogn,

Scola primara 1998 – 2004 Degen/Vignogn,

Scalem superiur 2004 – 2007 Lumnezia – dado.

Educaziun professiunala cun emprendissadi practicher da mecanist 2010 – 2013.

Emploiaus da Flims Transporte AG, 7017 Flims Dorf / GR, dapi 2014.

La mumma ed il frar ein vegni naturalisai a Degen ed han il dretg da burgheis da Lumnezia / GR. El ha mo paucas relaziuns pli cul Kosovo e va duas jamnas ad onn cun sia famiglia a visitar leu ses parents.

Proposta

Sin fundament dallas preexaminaziuns e dil discuors da natiralisaziun cul requirent propona la suprastanza communal da conceder il dretg da burgheis.

Decisiun

La radunonza communal decida cun 69 vuschs, senza cuntravusch e cun 4 abstenziuns, da conceder il dretg da burgheis a Mustaf Muzilijaj, naschius ils 24 da december 1991, naziunalitad da Kosovo.

7. Project da surbaghegiar igl areal Palius a Vella - localitads da stizun, pratica da miedi, habitaziuns e garaschas

1) Approbaziun dil project

Orientaziun

Il president communal orientescha la radunonza communal davart la situaziun actuala per il provediment medicinal ella vischnaunca.

La Lumnezia ha in miedi giuven ch'ei promts da vegnir a luvrar ella pratica da dr. Gian B. Bundi e da surpender quella pratica, cura che quel seretrei. Per las valladas periferas eisi ozildi in privilegi da survegnir in miedi da casa. La vischnaunca ei responsabla per il provediment medicinal. Al miedi da casa duein vegnir mess a disposiziun localitads per ina pratica moderna e funcziunala. El temps dad oz seigi dumandau da parter las plazzas da lavur. Las miedieas san ni vulan buca luvrar da gi e da notg sco ils miedis da pli baul mobein giavischien da luvrar parzialmein.

La vischnaunca less porscher localitads per ina pratica da miedi, nua che tut seigi sin in plantschiu. Cun il project dalla surbaghegiada da Palius duei il survetsch medicinal ella val vegnir mantenius. Vegnida sclarida ei la damonda daco buca engrondir la casa dil miedi existenta. Per ina pratica cun dus miedis ei quella casa memia stretga. Ei manca in ascensur. In project d'engrondir la casa era vegius elavuraus el decuord dils onns navonta dil davos tschentaner dalla Cassa da malsauns publica Lumnezia I, ch'era da lezzas uras proprietaria dil baghetg. Ils cuosts eran. Ils cuosts eran memia aults en proporziun dil gudogn da plazs e la funcziunalitad buca sufficienta.

La societad cooperativa ViVal Lumnezia encuera localitads novas per la stizun dil vitg a Vella, cun quei ch'il plaz dalla stizun existenta tonscha buca. La stizun vegn frequentada cunzun igl unviern da bia hospis da vacanzas. El project dalla surbaghegiada da Palius duei vegnir integrada ina stizun dil vitg cun localitads funcziunalas e raziunalas. La vischnaunca astga denton buca subvenziunar la stizun, quei fuss in pregiudezi per auters loghens. Ei dat la varianta da vender ni d'affittar las localitads, dependa denton era dallas finanzas dalla societad cooperativa ViVal Lumnezia. Strategicamein duei il terren restar en possess dalla vischnaunca, cun quei ch'ins sa buca tgei che succeda en 10 – 15 onns. Per quei duessen las localitads dalla stizun restar en mauns dalla vischnaunca.

Per la strategia d'immobiglias dalla vischnaunca ein ils objects vegni partgi en quater categorias.

1. La vischnaunca drova els per agens basegns.
2. En mintga fracziun han da star a disposiziun localitads per uniuns tenor las stipulaziuns el contract da fusiun Lumnezia.
3. Habitaziuns che portan ina rendita ed in tscheins sufficient, duein vegnir salvadas e buca messas sin fiera.
4. Objects ch'ein buca necessaris e rendan buca, duein vegnir vendi. Denton duein buca tut quels objects vegnir mess sin fiera ensem.

Ils 29 d'avrel 2015 ha la suprastonza communal envidau treis biros d'architectura da prender part dad ina concorrenza d'ideas per il project dalla surbaghegiada digl areal a Palius sin fundament d'in catalog da pretensiuns. L'idea da project digl architect Gion A. Caminada da Vrin ei vegnida valetada sco megliera dallas propostas. Las duas autras prevedevan da spazzar la casa nr. 6-33A e da baghegiar in object grond. Quella casa cuntegn duas habitaziuns che vegnan affittadas a famiglias per in prezi moderau. Las localitads dalla stizun existenta ein duvreivlas egl avegnir per magasin. Culs

tscheins d'affittaziun vegnan amortisai ils cuosts da cumpra da quella casa. La suprastanza communal vul salvar quella casa. Il terren duei vegnir duvraus a moda spargnusa e la vischnaunca ha buca las resursas finanzialas per projects en talas dimensiuns.

Ils 5 d'october 2015 era l'idea dil project da surbaghegiar la parcella nr. 4219 e nr. 4213 cun baghetg nr. 6-33A Palius, a Vella, vegnida presentada alla populaziun cun ina radunonza d'orientaziun. Il resun ei staus positivs.

Tenor l'idea da project ei prevedida ina stizun el plaunterren, ina pratica da miedi ell'emprema alzada sura ed ina ni duas habitaziuns per indigens ella secunda alzada sura, sco era ina mes'alzada sutterrana cun tschalèrs e localitads da tecnica. Las localitads che sesanflan ella casa nr. 6-33A Palius e che vegnan duvradas da present per la stizun dil VOLG dalla societad cooperativa ViVal Lumnezia, ein prevedidas sco part dalla stizun per deponer igl uorden. Ils containers davos casa, baghetg nr. 6-33A-A sin las parcelas nr. 4213 e 4371 duein vegnir allontanai.

Presentaziun dall'idea da project

Igl architect Gion A. Caminada presenta il project per in baghetg da fatschenta e habitar Palius a Vella, sin parcelas nr. 4219, 4213 cun baghetg nr. 6-33A e 6-33A-A, 4216 cun baghetg nr. 6-33, 4215 e 4371, ch'ei vegnius elavuraus ensemen cun la cumissiun da project. Prevedi ein dus objects.

Il baghetg principal ei tschentaus sin las parcelas nr. 4219 e 4213. El mira sin la via cantunala sco ils objects principals existents. El ha ina distanza da 5.0 m dalla via cantunala ed ei ligiaus cun la casa existenta, baghetg nr. 6-33A. L'alzada sutterrana cumpren mo la mesadad dalla surfatscha dallas alzadas sura. Ella cuntegn tschalèrs e localitads da tecnica. El plaunterren ei prevedida la stizun. Las portas dominontas per ir en stizun sesanflan dalla vart enviers la via cantunala. Vitrinas ein buca prevedidas. La casa duei corrispunder ordadora a quei ch'ei lien. Las localitads dalla stizun existenta dil VOLG ella casa nr. 6-33A duein vegnir duvradas egl avegnir sco magasin per rauba dalla stizun. Ei vegn quintau cun cuosts da CHF 720 / m³ per la construcziun dil baghetg principal.

Il baghetg principal e concepìus cun ina construcziun semplia. Las preits circumdantas portan la construcziun, enameiz il baghetg tegnan duas petgas la construcziun. La stizun existenta ella casa nr. 6-33A stat sco ella ei. Per endrizzar leu ina pasternaria tonscha il plaz buca. Ella stizun nova ein prevedi treis plazz per cassas. Quei local ha buca finiastras, denton dat ei la pusseivladad da funcziunar entuorn quel pli tard cun far finiastras. L'alzada miez ei prevedida per ina pratica da miedi cun ina surfatscha da 228 m². Ell'alzada sisum ei prevedida ina habitaziun da 4 ½ stanzas cun ina surfatscha da circa 150 m² e localitads da fisioterapia. Il volumen dil baghetg ei circa 3'600 m².

Il baghetg secundar ei tschentaus sin la parcella nr. 4216, ch'ei en proprietad privata. Il clavau existent sto vegnir spazzaus. Ei setracta d'in baghetg tipic e pregnant pil liug, ch'ha denton buca gronda valeta architectonica. Il nuegl ei fatgs cun quadrels da betun e las preits ein buca ligiadas giu. Ils vendiders da quei baghetg vulan mintgamai ina garascha el bahetg che vegn construius da niev. Per survegnir ina buna relaziun cun la dimensiun dils objects el contuorn duess vegnir construiu aunc in'alzada supplementara sur il plaun miez, che cuntegn quellas garaschas.

Ils cuosts per ina habitaziun da 90 – 100 m² ell'alzada sisum dil baghetg secundar ein calculai cun CHF 540'000.00. Sch'ei vegn fatg mo la construcziun brutta, fuss ei da quintar cun cuosts supplementas da circa CHF 85'000.00 per in'alzada supplementara dil baghetg. Quel vegness 3 m pli aults. In volumen pli grond da quei baghetg ei essenzials per l'adattaziun digl object al contuorn.

Tenor calculaziun da cuosts vegn quintau cun expensas da ver 3.2 milliuns francs pil baghetg principal e circa 1 milliun per il baghetg secundar davostier, cun ina deviazion

da ± 15 % tenor normas SIA. Cuosts per inventari dalla stizun e pratica da miedi ein buca prevedi. Ils indrezs ein caussa dils locataris.

Discussiun

Ella discussiun vegnan tratgas a strada la problematica da parcadis e la damonda da mantener la casa existenta, baghetg nr. 6-33A.

La casa existenta nr. 6-33A ei sbassada dalla vart dalla cantunala enviers sid per circa 20 cm, denton eis ella sestabilisada e sfundra buca pli. Ils cuosts da remplazzar quella casa fussen aults. La suprastanza communal ei dall'opiniun che la vischnaunca sa buca far investiziuns senza misericordia e ch'ella sto ir in pass suenter l'auter. Igl object existent ei rentabels e duei vegnir mantenius.

La munconza da parcadis a Vella duront la stagiun d'unviern ei enconuschenta. A Palius drova ei parcadis per la casa communal e per la stizun. Cul project dalla surbaghegiada da Palius vegnan duvai ulteriurs parcadis. Tut quels ein buca realisabels directamein sper ils baghetgs. Denton dispona la vischnaunca da parcadis da tschella vart dalla via cantunala sper la piazza publica da recreaziun. Ils emploiai dall'administraziun communal vegnan a stuer duvra da quels parcadis ed han buca parcadis gratuits reservai per els sper la casa communal. La construcziun d'ina garascha sutterrana caschunass memia bia cuosts.

Il problem latent da parcadis a Vella serestrenscha sin in temps relativamein cuort oravontut per quels che fan sport d'unviern. Per saver meglier quella situaziun drova ei in concept da parcadis pil vitg.

Decisiun

La radunonza communal decida cun 83 vuschs senza cuntravuschs ed abstenziuns d'approbar il project presentau per la surbaghegiada digl areal Palius a Vella cun localitads da stizun, pratica da miedi, habitaziuns e garaschas.

2) Concessiun d'in credit da CHF 192'000.00 per elavurar il project da baghegiar

Per far la planisaziun entochen la fasa da project, cumpru il honorar d'architect, la damonda da baghegiar ed ils honoraras d'inschignier da baghegiar, eisi da quintar cun cuosts da CHF 192'000.00.

Decisiun

La radunonza communal decida cun 85 vuschs senza cuntravuschs ed abstenziuns da conceder in credit da CHF 192'000.00 per far la planisaziun entochen la fasa da project da baghegiar.

8. Varia

1) Elecziun da luvriers communal pil survetsch tecnic

La davosa elecziun da luvriers communal pil survetsch tecnic ha fatg surstar Luregn Giusep Blumenthal. El vul saver daco che las annunzias da luvriers da Suraua ein buca vegnidadas risguardadas.

Il president communal orientescha, ch'ei ha dau 20 annunzias per las duas plazzas cumpru candidats da Suraua. Cun sis candidats ein vegni menai discuors da presentaziun. Quels candidats ein vegni elegi che han ademplier il meglier las pretensiuns dalla piazza e buca tenor il vischinadi nua ch'els stattan.

2) Plazs da setschentar cun helicopter

Katharina Belser vul saver sche la problematica dils plazs da setschentar cun helicopter en Lumnezia seigi sclarida.

Il president communal orientescha che la suprastanza communal ha consultau in giurist, che ha priu posiziun tier las pretensiuns giuridicas per plazs da setschentar cun helicopters.

3) Finiziun

Il president communal Duri Blumenthal engrazia als convischins che han priu part dalla radunonza communal per lur preschientscha e buna collavuraziun ed envida els da prender part digl aperitiv che vegn purschius suenter la radunonza.

7144 Vella, ils 11 da mars 2016

Il president:

Igl actuar:

Duri Blumenthal

Marcus Cavegn